



25

XXVIII. 2. 36.

~~Deal. vol. 7589. 61~~

404

795

DISSERTATIO

quam

FAUSTI SOCINI OPERIBUS

præmitti voluit

EQVES POLONUS [Samuel Przypkowski]   
 ud. chap. in fine

autor: Przypkowski Samuel

Anno M. DC. XXXVI.



brak powęztkowycel 6. stron.

## LECTORI S.

**V**enit ad te, CANDIDE LECTOR, & usibus tuis se devoverit  
 erudita Equitis Poloni dissertatio. Eam ante aliquot annos  
 flagrans pietatis ardor expressit, ut, quia Fausti Socini opera  
 sub praelum à nobis tum revocanda erant, unà cum Vitâ ejusdem  
 prius in vestibulo te aditui ritu exciperet, quàm in eorum ady-  
 ta penetrares. Sed cum inviderint nobis laudabilis voti successum  
 iniqua veritati tempora, & scriptorum Socini editionem usq; distu-  
 lerint, in nova consilia animus flectendus fuit. Vitam proinde Fausti  
 divulgatam à sociâ dissertatione publico dare visum est, ut agnoscat  
 tandem orbis ingens illud cœli depositum, & quem natalium splendo-  
 rem fors aspera sepeliverat spirante, is jam satis functo reviviscat &  
 ad meritam sui venerationem mentes hominum accendat. Verum  
 Vitâ illâ editâ, hæc quoq; dissertatio mordere carceres & post longâ  
 molesta custodia tadia foras spectare cepit. Nos initio quidem ambi-  
 gui aliquandiu & animi suspensi stetimus. Monebat hinc insignis  
 commodi spes eiq; jam alludentia signa, ut emitteremus cupientem:  
 sed illinc longo à nobis intervallo disatus autor obstabat, sine cujus  
 suffragio precipitare editionem inconsulta temeritatis videbatur.  
 Vicit tamen utilitas tandem, & ancipitem dubitandi curam sic ab-  
 stulit, ut ab autore festinati officii expectare veniam, quam apud  
 alios neglecti culpam contrahere maluerimus. Accipe igitur, Le-  
 ctor, benigno vultu ad te properantem, & ita lege, ut judicii quoq;  
 adhibeas dexteritatem: ita judica, ut nihil odio, nihil gratia dedisse  
 videaris. Vale.

39299  
I b

7  
spem tantum blandam aperuit, sed ipsius spei non dubia dedit pignora. Habemus paternæ fidei obsidem filium, cujus ipsa primum doctrinæ puritas & sanctitas etiam sine advocatis ac patrocinio satis pro se perorat: cujus vitæ innocentia doctrinam, stupenda miracula ipsam præterea confirmant innocentiam. Cujus mors pro suæ doctrinæ testimonio suscepta, optimæ fidei specimen arguit: superata verò certissimi testimonii veritatem ostendit. Cujus a morte suscitatio ardui promissi exemplum, exaltatio verò atq; imperium certitudinem repræsentat. Cujus deniq; res per Apostolos gestæ & ille Spiritus admirandorum operum opifex, qui tandem armatum orbem inermis subegit; qui ad virtutis ærumnas tot gentes sine illecebris pellexit, nunquid levia videntur divini ejus imperii simul atq; spei nostræ documenta? Credibile verò est olim immensam laborum molem non modò sine ullâ mercede, sed præsentissimo exitio, ullos mortalium in hoc ævo subituros fuisse, nisi habuissent, quo posthumæ spei sustentarent fiduciam? An excelsæ fidei robur in recenti adhuc rerum gestarum memoriâ tanta sui experimenta dare potuit, si suberat ulla non levis aut iniqua diffidentia suspicio? Ita q; nihil propius factum est, quàm ut universo orbi earum rerum fides fieret, quas initio paucissimi & simplicissimi mortalium oculis suis usurpârunt. Tot urbes atq; imperia, tot gentes ac populi, tot insulæ ac terrarum ultimæ oræ, quâquam in aliis rebus plerumq; discordes, in eorum tamen fide consentiunt, quæ  
Christi.

Christiana religio pollicetur. O fortunatum igitur humanum genus, cui pridem in altâ demerso caligine, tanta lux repentè oborta est! ò beatam conditionem hominum, quibus ad cœlum & immortalitatem via non modò comiter ostensa, sed firmiter strata atque munita est. Hæc illa est vera felicitas, quæ & unicuiq; seriò volenti patet, nec invito eripi potest. Nihil in illam fortuna, nihil fabulosa Fati necessitas, nihil anilis Parcarum colus jactet potestatis. Ipse Deus quod in eam juris habuit, tradidit iis qui promissis suis per Christum sincerè crediderunt, pactorû memores, nobiscum

*Quæ pepigit, nati quos sanguine prodigus emit.*

Postremò quæcunq; humanam olim in hac vita prosperitatem turbabant aut morabantur, longè ab hac felicitate remota sunt. Tanta in eâ virtuti præmia proposita sunt, ut omnibus ad supremum ejus fastigium accessus pateat: tanta præsidia atq; adminicula addita, ut neminem ab eo infelicior indoles, neminem prava educatio, neminem ingenii tarditas, neminem literarum incitiam, non sexum imbecillitas, non humilitas sortem nascendi, non inopia, non vitæ institutum, non ulla deniq; alia res quenquam, nisi voluntaria improbitas arceat. Postquam Christiana religio tot gentes cœlestibus curis imbuit, desiit Fortunæ virtus supplex fieri, ne acerbissimis casibus cursum suum turbaret, ne solida ejus gaudia terroribus humanis aut luctibus interciperet. Tunc illa profectò cœcum istud numen sine superbia spernere, tunc sine temeritate provocare cœpit:

cœpit: tam incolumitatis suæ quàm victoriæ secura. Nam & in præsentî vitâ non plus in virtutem fortunæ licere Deus voluit, quàm quantum humanissimo parenti sveta erga liberos indulgentia permittit. Et ut minarum ejus ictus non sint irriti; gloriæ nostræ militat ac felicitatis incremento, quando omnibus malis superstites, lata & gloriosa laborum memoria manet. Deniq; ipsa illa invicta moriendi necessitas, quæ postremò vitæ agmini incumbens, etiam undique cumulata ejus gaudia eminens terrore, cominus luctuoso carpebat interitu, jamdudum Christianæ virtuti ac Fidei domitum caput submisit. Nec obstat, quod nondum hostis hic arma abjecisse videatur, quum præcipuus ejus mucro retusus sit, morte pridem per reducem Christi vitam debilitata. O felix & plus quàm Saturnium seculum, quo primùm tam amœnum jubar terris illuxit! Poterat mortalium genus in tam salutiferâ luce facili & inoffenso gradu vadere ad immortalitatem: sed ipsi tanta felicitate, nescio per quam vicissitudinis injuriam, sincerè diu frui non licuit. Sive quis mundo infestus genius; sive ipse sibi ingratus orbis hanc fortunam invidit, sive hoc denique fuit supremi Dei consilium, ut virtuti nunquam idoneum certamen deesset: spem certè tam invidiosæ sortis, ipsumq; ad eam aditum à multis jam seculis maximis difficultatibus involvi contigit. Primùm enim ipsa spei nostræ fiducia (quæ sola nos in veræ beatitudinis fastigio sistere potest) ad motis pænè machinis subruî cœpit ac labefactari.

inde ipsa Religio Christi, quæ sola humano generi tantæ spei fidem fecerat, non uno nomine in dubium vocata est. Denique non modo concipiendæ, sed etiam adeundæ huic spei ingens est objectum impedimentum. Quodq; maximè doleas atq; indignè, hæc omnia facta ab iis, qui se speratæ felicitatis candidatos professi sunt.

Etenim, ut ad id, quod primo proposuimus, revertamur, quæ erat machina subruendæ fidei nostræ aptior, redeundi ad vitam difficultate? Vitam fortè in immensum produci posse, utcunq; rationi humanæ probari poterat, sed ereptam postliminiò in æternum restitui, non contra rationem quidem, sed tamen suprâ fidem erat. In tanto præter naturæ morem rei miraculo credere humanum genus, nisi exemplo, vix poterat. Ita q; ejus rei certum Deus subjecit omnium oculis experimentum, revocato ad vitam eo, qui naturæ mortalis conditione nihilò cæteris præstabat. Hoc tam evidens fidei nostræ adminiculum communis Christianorum opinio nobis eripit: si IESUS ille resuscitatus est ille ipse summus Deus, a patre essentiâ non diversus. Nam nec bona fide mortuus erat; (quis enim supremum numen planè mori posse censeat? quis personam illam Patri coæternam & homouision trucidatam asserat?) nec in ipsâ morte existens (quemadmodum nos) aliena ope indiguit: Et ad vitam gloriôsè redux, propriis viribus, nec unquam adempta sibi aut depositâ potentiâ, sese ipse è faucibus lethi eripuit. Cedo, quid in

nobis

nobis simile? Non accessiones nostri, sed nos ipsi morimur: quid verò spei sit in nostris viribus, penitus per mortem fractis & prostratis? Certè defunctorum manes aut personæ in id non excubant, ut se suapte potentia ex sopore tam profundo excitent. Parum fuit fidem nostram in re maximi momenti tam periculose convelli: quin etiam ne aliunde quærere posset, quo se erigeret, satis providè prospectum est. Cum enim præcipuum vivæ fidei officium esset, tam sublimibus Dei promissis sincerè credere; vulgò persuasum est Christiano populo, in eo cardine verti fidei specimen, ut certas de Dei natura aliisque; similibus dogmatis sententias credamus. Ita à vero fidei exercitio, ad inanium opinionum ambitionem, mentes omnium deflexit publicus error atque detorsit. Quo factum est, ut de natura Dei omnes disputarent; promissis pauci crederent: ac proinde præceptis quoque; non multi obtemperarent. Ita exiguo momento fides in opinionem, religio in philosophiam, virtus in contemplationem, zelus in contentionem, caritas in studia partium degenerarunt. Neque aliter fieri poterat, posteaquam relictis moribus, scela colli atque; examinari capere ingenia.

Veniò nunc ad alterum illum concussæ fidei arietem, quo per universæ religionis latus spes nostra petitur. Coelum ac sydera bene meritis nulla secta, nulla religio solidè despondet, præter Christianam. Perit tantæ sponsonis pignus, si sponsor ipse vocatur in dubium. At quominus falsi condemnetur, aut justissima suspici-

one traducatur Christiana religio, nulla mora est per eos, qui ipsi falsa atq; ab omni ratione abhorrentia dogmata veluti fundamenta substernunt. Quis non illachrymetur malis Ecclesiæ, reputans quantum à primigenia castitate desciverit? Atq; in medio dolore nonnunquam & justa erumpit indignatio, quòd in proximo de Deo dogmate non puduerit priscos illos Episcopos S. scripturarum sensum ad normam placitorum, Græcanicæ dicam, an Barbaræ philosophiæ, violenter exigere. Gnosticis olim vetus Ecclesia irrisit, quòd prophanam philosophiam, additis è Christiana doctrina centonibus prodigiosè contextis, corruperint. Ipsa verò, si Diis placet, magis sobriè philosophata, maluit Christianam Theologiam, quàm illius ævi eruditionem inquinasse videri. Vsq; adeone patres illi miserum putarunt, illarum artium rudes censerì, quæ tunc flagranti seculi studio celebrabantur? Sed quod accidit iis, qui duabus sellis sedere volunt, ut utraq; excidant; nec sacrae revelationis primævam simplicitatem, nec prophanorum ingeniorum conjecturas sincerè retinuerunt. Quamobrem absurdis ac invicem pugnantibus sententiis referta sunt Ecclesiæ dogmata: quæ, quia nobis notitias à naturâ insitas ipsamq; adeò rationem à stirpe evelunt, Fidei obtentu ingeruntur. Quod ferri utcunq; posset, primùm si vim humanæ mentis superarent, non everterent. Multùm autem interest, utrum illa rationem alicujus rei non capiat, an videat falsitatem. Verum enim sæpè tam altè reconditum est, ut erui vix possit,

possit; at falsum rarò se in eas latebras abstrudit, quin suis vestigiis deprehendi queat. Vtinam verò tam facile ignorantia mederi possemus, quàm promptè errores falsi convincere licet! Aliàs quid ultrà menti nostræ relinquetur, si quo prætextu damnare timebit, quod implicat contradictionem. Præterea ferri quoq; posset ista paradoxorum sub Fidei clypeo defensio, si saltem bonâ fide ab examine rationis, ad testimonii divini auctoritatem refugerent. Sed ubi sub rationis iudicio causa laborare incipit, subitum à sacrâ revelatione præsidium arcesitur. Postquàm hæc ipsa revelatio venit in examen, primùm (quod antea quoq; innuimus) Platonice ingeniis quàm scriptoribus Apostolicis evidentius patefacta deprehenditur. Deinde si quis est in S. oraculis locus, qui ejus fidem facere videatur, tam obscurus est, ut rursus ad volucres atq; aëreas humani cerebri contemplationes redeundum sit, ex quibus de ambiguo ejus sensu constet. Quibus in consecutionibus neccendis, si causa iterum titubare incipit, iterum quoq; ad cœlestis patefactionis fidem, veluti ad notum diverticulum, ridiculus fit receptus: quasi jam pridem confessum esset, hoc esse dogma divinitus traditum, & non id ipsum tunc vel maximè veniret in dubium. Ita dum incerta ratio à suspecta revelatione, & hæc iterum ab illâ, intempestivam petit opem, in utraq; tandem parùm præsidii deprehenditur. Postremo tot in S. literis, tamq; manifesta adversæ sententiæ testimonia extant, ut neq; salvis iis paradoxa dogmata

gmata consistere possint, neq; in dubium vocatis S. librorum maneat autoritas incolumis. Quamobrem etiam nemo è Christianis testimoniorum istorum vel fidem, vel sensum vocare in dubium audet: manca tantum & mutila esse, ideoq; iis ad plenam rerum divinarum notitiam aliunde nonnihil addi debere contendunt. Concedamus id sanè postulantibus, dum ne obtentâ hâc addendilicentiâ abutantur, ad subruenda ea, quæ videlicet supplere polliciti sunt. Sed quid? si talia addita menta proferunt, quæ eorum, quibus adduntur, fidem & rationem penitus evertunt? hoc verò minimè ferendum est: nam testimonia nostra supplere promiserant, non tollere. At enim supplementa ista ex S. oraculis hauriunt, ad quorum normam cætera eorum testimonia exigì postulant. Equidem non negamus, scripturam fidissimum esse sui ipsius interpretem. Sed primùm videndum est, quâ fide id alicunde ex scriptura hauriant, quod alibi apertæ ejus sententiæ repugnat. Deinde rogandum est, quâ fronte eos locos, de quorum sensu ipsis (ob apertam evidentiam) cum adversariis ferè convenit, explicari postulent per alios, de quorum expositione maxima lis est. Quis est iste tam perversus ac præposterus cognitionis ordo, qui per tenebras lucem illustret? quasi hæc sit ratio percipiendi res notissimas, si in ignotis cœcutiamus. Quantum igitur in divinis oraculis præsidii opinionones habeant rationi alioqui repugnantes, & quo jure fidei opem implorent, ex iis, quæ disseruimus patet.

Sed quid

Sed quid refert? si tamen maximæ hominum parti persuasum est, plurimum Religionis Christianæ interesse, ut tam incredibilia credantur. Neque hoc unum est caput, in quo tam divinæ Fidei veritas traducitur. Quid ego hoc loco memorem, foedisimorum errorum colluviem, quibus purissima quondam ejus doctrina passim inundata est. Nulla fuit olim tam profana opinio, nullum tam anile delirium, nulla tam ridicula superstitio, quæ non in eâ (per summam hominum injuriam) non modo locum, sed pretium quoq; invenerit. Taceo de Transubstantiatione, de Sacerdotum atque Pontificis infinita potestate, de cultu simulachrorum, portentosas sententias: taceo arcesfitas ab Academia, de Limbo, de Purgatorio, fabulas: taceo tot apparitionum spectra, tot absolutionum nundinas, atque delictorum pretia, tot alienos ritus atque peregrinas ceremonias: quæque alia sive Græca quoq;, sive Latina tantum Ecclesia, tamdiu pro Fidei columinibus venditare non erubuit. Quicquid enim aut ab omni ratione absonum, aut S. literis repugnans Christianorum vulgò per tot secula obtrusum est, omne id in religionis ac Fidei nostræ contumeliam redundavit, cum nec ingenitum nobis mentis lumen ullo modo extinguere, nec Scripturæ autoritas salvâ fide nostrâ possit convelli. Sed fuerit ista sanè lapsi in barbariem orbis deploranda calamitas: nunc postquam feliciore seculi luce obortâ è spissa caligine emergere cœpit, indignum est experrecto atque laboranti easdem aut tetriores etiam tenebras of-

bras offundi. Quo enim pertinet ineluctabilis divinæ destinationis conditio? quo iniquissima Fati necessitas, etiam supra antiquorum somnia fabulosa & barbara? quæ non æquam omnibus & communem vitæ Legem, sed ratum jam de immutabili singulorum statu fixit decretum, quæ omnia scelera atque flagitia, priusquam ulli venirent in mentem, ipso (quod ajunt) actu fieri voluit, ac certis hominibus assignavit, & tamen acerrimè vindicat: quæ denique id unum in hominibus si ve immensis præmiis, si ve immanibus suppliciis dignum censet, quòd Dei voluntati, ut maximè velint, resistere nequeant? Quò spectat, inquam, tam scæva ac sinistra opinio, nisi ut divini simul imperii atque humani obsequii rationem atrâ involvat caligine? Quid sibi vult & illa quorundam peculiaris de bonorum operum pravitate? quid altera communior de alienæ sanctimoniæ proprietate ac possessione nostra, sententia? Præter offusas menti nostræ tenebras, per miram utrobique pugnantium rerum mixturam, nonne à veræ pietatis studio arcemur? si & optimè agentes terret benefactorum conscientia, & pessimè viventibus non deest alieni meriti fiducia. Quid persolutum propriè pro gratuita impunitate pretium? quid æquisimæ severitatis Lege injunctum nobis, quod fieri non potest? quid ipsam denique humani arbitrii, hoc est, libertatis servitutem commemorem? Non magis omnes istæ opiniones cum sincero piè vivendi conatu, quàm secum singulæ conciliari possunt. Quis enim carissimarum

marum rerum impendio præmium captet, quod jam alieno sumptu penitus ac sine ulla suâ operâ sibi putet quæsitum? quis eò per ardua & salebras niti contendat, quò non modò evadere posse, sed ne vadere quidem velle, sibi integrum esse, sit persuasus? Intelligo me eos locos doctrinæ Reformatæ (quæ vocant) tetigisse, qui veluti delicatissimæ partis ulcera tractari sine exquisito doloris sensu nequeunt. Itaque plura non addam; nec enim verborum compendio comprehendi possunt, quorum ne numerum quidem mentè inire facile est. Et alioqui sat scio nonneminem fore, qui lectis istis pauculis, veluti inopinato stimulo ictus, exiliat, atq; stomachetur; quamvis ita moderari stylum contendam, ne cui meritò bilis moveri possit. Indormit enim placidè suis vitiis Christianus orbis, istis opinionibus molliter suffultus: quem si quis pulvinum delicatæ cervici subtrahere ausit, illicò

— *orbâ tigride peior*

furit accensa Theologorum factio, & Fidei ac Religionis fortunas agi clamat: cum tamen vel privata nonnullorum existimatio, vel publica tantùm peccandi illecebra veniat in periculum. Honori & gloriæ Dei Christiq; zelum hunc imputant: quasi Deo Christoq; cordi sint ejusmodi præconia, quæ verum cultum & observantiam Numinis ejus, sitam in obsequio, ex animis hominum funditus extirpant. Dandam sibi operam unusquisque pro virili existimat, ne qua de essentiâ, personâ, beneficio; breviter, gloriâ Dei Christiq;

humilis opinio obrepit. Rectè fanè: Sed enim ò  
bone vir,

——— *quid pulchra vocabula pigris*

*Prætentas vitiiis.*

Matth. 5. Vis tu gloriam Deo tuâ operâ verè ac magnificè as-  
feri; da operam, ut præluceat omnibus virtutum tu-  
arum splendor. Quod ut promptiùs facere possis, re-  
move omnia opinionum portenta, quæ te in veræ pie-  
tatis cursu remorari possunt. Nisi hoc studium ad res  
divinas attuleris, necesse est te in magnâ earum igno-  
ratione versari. Nam quod tu gratiam Dei atq; Christi,  
quæ obsequio quæritur, assentatione demereri te posse  
putes, inanissimam spem alis. Aspernabitur Christus  
Matth. 6. blandimenta & titulos, quorum sub umbra hætenus  
inobedientia mandatorum ejus delituit. Illuxit autem  
orbi salutiferum jubar: sed homines magis adamavê-  
re tenebras, quia improbitatis suæ lenocinium depere-  
unt. Quid igitur mirum? tam absurda, tam pugnancia,  
tam ab omni ratione remota & abhorrentia incautis  
obtrusa? Omnia ista per diram noctem atq; caliginem  
obrepserunt, dum homines dulci peccatorum sopore se-  
pulti animum ad cæcas insidias non advertunt. Sed  
præcipuè, ut diximus, Christianæ religionis existima-  
tioni pessimè consultum est: postquam hominibus per-  
suaderi cœpit, eam sine tam putribus & infirmis admi-  
niculis stare non posse. Quæ non tantum evidentissi-  
mæ falsitatis suspicione; sed eo quoq; nomine fidem si-  
bi derogant, quod virtutis stirpem ex animis hominum  
radici-

radicitus vellant, quam unâ cum cæteris communi notitiæ infitis principiis mens nostra, quicquid conetur, damnare non potest. Iam verò per tot inextricabiles errorum ambages vocata in dubium Religione, (ut alienos taceam) quotusquisq; ipsorum Christianorum tot tamq; gravibus suspicionibus intactam & illibatam spei suæ fiduciam servare potuit?

Hinc illud tandem promanavit, (quod tertio loco proposuimus) ut impeditâ fide ac spe nostrâ, quæ sola nos in obsequio Christi retinere potuit, ipsum quoq; obsequium, ac proinde rectum ad speratam felicitatem iter impeditum fuerit. Omnis enim generis crimina atq; flagitia ingenti agmine in Ecclesiam irrupere. Tot morum corruptelis, tot morbis & ulceribus, scaetet universum Ecclesiæ corpus, ut longum sit singula persequi. Innumeri errores infinitos abusus peperere. Ita q; omisissis cæteris, quæ cum infamia Religionis vulgò regnant, duo tantum commemorabo, quorum non modò permissa impunitas, sed injuncta quoq; impietas est. Primùm enim cultu summi numinis, à spirituali & cælesti ratione, ad informes ritus ac ceremonias detorto, triste ac pudendum Idololatriæ genus in vectum est: Et quasi periculum esset, ne injussi mortales timidiùs expressa Dei mandata calcarent, publicis Ecclesiæ sanctionibus & dogmatis, tantum non conceptis verbis imperatum est, ut prima ac potissima Dei præcepta violarentur; alterum verò etiam è numero reliquorum decem expungeretur.

Deinde nova illa & Regia Lex Christi, quæ inter alias, non modò ut perfectionis complementum & cumulus, sed ut peculiaris populi ejus tessera eminet, Lex, inquam, Caritatis foedisimis moribus atque institutis publicè abrogata est. Taceo alia, quæ in fraudem ejus, non clandestinâ infirmitate, aut privato aulæ, sed publico consilio, factitantur. Illud unum sufficit, quod in pudendam Ecclesiæ Christi contumeliam à multis jam seculis inolevit: Eos homines, qui IESU illi Nazareno pro Christo Dei agnito, se suasq; spes atq; opes crediderunt, qui in familiam ejus atque militiæ sacramentum nomina dedere, quos ne odisse quidem cuiquam (qui modò Christi legibus se solutum non putet) fas est, non aliam ob causam, quàm quod aliqua in re dissentiant, à cæteris suis conservis & commilitonibus, nò modò acerbissimis odiis, contumeliis, injuriis violari: sed etiam exquisitis cruciatibus, & immanibus atque horrendis suppliciis mactari. Non est hæc privatæ crudelitatis macula: Ecclesiæ nomine hæc tam dira ac detestanda patrantur. A multis enim seculis invaluit in populo Christi prophana & crudelis factio, quæ Christi Ecclesiam ferro atque ignibus atrociter depopulata, ejus se tamen nomine, cæteris exclusis, sola immeritò venditat. Hæc illa est, quæ ex cæde ac vulneribus innocentium tam infamem sibi sanie ac tabum aspersit: hæc est, quæ sibi tot funestis ignibus, tot feralibus flammis, hanc indelebilem notam, hæc stigmata ad sempiternum dedecus inusit: hæc est, quam oppressorum  
manes,

manes, ad summi Iudicis tribunal, non minùs in coeno vitiorum, quàm sanguine infantium lapsantem ac trepidam trahunt: hæc deniq; factio Reipub. atq; Ecclesiæ imposuerat principem, cuius potentiam nuper gremio Europæ incubantem genuit Christianus orbis, nunc iterum horret ingruentem. Etenim durissimæ, quâ premebamur, fortis misertus benignissimus Deus, jugum hoc à nostris cervicibus depulerat. Iamque discussâ turpis servitii caligine, amoenissima lux libertatis affulgebat, cum subitò tempestatum nebulæ coortæ tristiores pæne prioribus tenebras minantur. Quid, nisi nostra ingratitude, efficere solet, ut Deum beneficii sui pœniteat? Præmiserat ex orienti luci gratisimum auroræ splendorem: nos maligno crepusculi lumine cõtenti, clausimus oculos ad ipsam solis jubam, ut in tenebris liceret verecundiùs peccare. Libertatem restituere cæperat: nos maluimus servitutem. Quam enim dominationem alii in nos, eandem nos in imbecilliores exerceri passi sumus, ut liqueret palàm nobis non tàm servitium, quàm dominum displicuisse. Quid igitur accusemus Deum, quòd nos in teterrimas iterum retrudat tenebras, qui lucem tàm foede aspernamur? quid queramur nos in servitutem Pontifici postliminiò reddi, qui nos ignobilioribus dominis erubescendo mancipii nexu addiximus? Si servire libet, est aliquis in honestiore capiendò hero dilectus. Quid ergo? Inuitabimus omnes, ut excussum olim cervicibus jugum iterum accipiant? minimè verò. Nam quanquam no-

vitia servitutis piget pudetque; tamen cum veteri ty-  
 rannide pulsam Idololatriæ labem meritò nobis gratula-  
 mur. Gratulamur & aliis multis in rebus suam Eccle-  
 siæ faciem redditam. Sed præcipuè S. libris debitam  
 auctoritatem ac reverentiam vindicatam pro eximio  
 Dei munere agnoscimus. Iacta sunt igitur optimæ spei  
 fundamenta: superest ut pulsæ Idololatriæ addamus  
 restitutam Caritatem, quæ, nisi proscrip̃tâ non modo  
 crudelitate, sed omni quoq; tyrannide atque iniquita-  
 te, restitui nequit. Sacrorum verò librorum, quam asse-  
 ruimus, auctoritate, atque ductu utamur ad profligan-  
 das tenebrarum reliquias, quæ hæctenus non minùs  
 spem salutis convellebant, quàm fidem & formam Re-  
 ligionis nostræ deformabant. Quid cunctamur ampli-  
 us? quid expectamus acriores excitantis Dei stimulos?  
 Hac profectò tempestate, nescio quid grandius morta-  
 li ore insonuit. Non jam humana voce, sed metuenda  
 divinorum judiciorum objurgatione admonemur offi-  
 cii. Triste quidem, sed salubre Deus ægritudini nostræ  
 remedium adhibet. Nimia nos corruperat felicitas, &  
 in rerum prosperarum blandimentis palàm jam solve-  
 ramus cupiditates. Quos ex nobis flagitiorum aut certè  
 honestæ improbitatis vis non abripuit ad crudele au-  
 stera veritatis odium, eos tamen aliquis rerum terre-  
 narum amor aut metus, molli ac lenta compede in  
 blandis detinuit erroribus. Illorum impietas supplici-  
 um, horum imbecillitas auxilium postulabat. Itaq; su-  
 um singulis dispensat providentia remedium. Obrutæ  
 vitiis

vitiis mentes, recidivæ caliginis poenâ luunt veritatis  
 odium atque contemptum. Probis autem, sed tamen  
 rerum terrenarum nexu constrictis animis laxat vincu-  
 la divina benignitas. Præstiterat sanè in florenti fortu-  
 na atque rebus integris ingerentem se amplecti veri-  
 tatem. Sed ne sic quidem clementiss. Deus probis pe-  
 ctoribus malè consuluit, quod illecebras & impedimen-  
 ta, quib<sup>9</sup> ab ejus cognitione arcebantur, removit. Itaq;  
 nunc palàm atque conscio orbe periculum facit, quâ  
 fide unusquisq; nostrum ab Antichristi grege secesse-  
 rit. Si quos factionis conspiratio, aut studium partium,  
 aut humana aliqua ratio hæctenus in Christi militia cõ-  
 tinuit, patet illis transfugium ac receptus illuc, ubi plus  
 præsentis emolumenti ostenditur. Vos verò quicumq;  
 Imperatoris vestri fidei credidistis dilatae mercedis sti-  
 pendium, ne despondete animos in tanta sævientis for-  
 tunæ tempestate. Ita suos Deus exercet atq; explorat.  
 His calamitatibus ab omni ævo virtus ac veritas edu-  
 cata est: his adolevit speciminibus: his etiam malis  
 Christus ipse & Apostoli, his primævæ Ecclesiæ mar-  
 tyres & confessores conflictati sunt. Istitis deniq; ar-  
 mis Mundus semper in meliores sævit, istis cuniculis  
 Antichristi tyrannis jam à multis seculis irrepsit, istis  
 rationibus magna pars eorum, quos plùs æquo suspici-  
 tis, Patrum grassata est: istis artibus illa, quæ etiamnum  
 adoratis, stetère concilia, cum in Synodis controversiæ  
 violentis factionibus atque auctoritate deciderentur,  
 decreta verò Synodorum Imperatoriâ vi ac potestate,  
 multâs

mulctis, ignominis, exiliis, ac tandem etiam sanguine  
 & extremis suppliciis sancirentur. Degustare vos De-  
 us voluit ejusmodi artium æquitatem atque ingenium,  
 ut intelligere possetis, quid vobis sit de ea auctoritate  
 judicandum, quæ similibus modis atq; rationibus cre-  
 vit ac stabilita est. Quin igitur abjectis istis prophanis  
 ac meritò suspectis ætatum atque auctoritatum præju-  
 diciis, unicam S. oraculorum fidem imploratis, atq; in  
 eorum patrocínio veritatis cùm inveniendæ rationem,  
 tum inventæ tutissimum præsidium quæritis. Adferte  
 modò sinceros ac veri cupidos animos: & quoniam vo-  
 bis propemodum non majori jacturâ atq; impendio to-  
 ta veritas constare potest, quàm hætenus portio ejus  
 constitit, audete obviis eam ulnis recipere, quum vobis  
 tandem gratis atq; impune sui copiam faciat. Ita fiet ut  
 firmioribus adminiculis spes atq; fides vestra suffulta,  
 sese ad verum Dei cultum atq; obsequium promptiùs  
 erigat, in eoq; stabilior maneat. Quam ad rem profectò  
 vobis atq; universæ Ecclesiæ fructuosissimam operam  
 navavit is, cujus hoc tempore relicta posteritati ope-  
 ra in lucem prodeunt: Faustus Socinus, vir genere, vir-  
 tute, atq; ingenii sui monumentis nobilis; & ubi unâ  
 cum sæculi ignorantia deferbuerit invidia æstus, lon-  
 gè apud posteros futurus nobilior. Cujus viri laudes  
 filere præstat, quàm modicè persequi. Præsertim cum  
 eas Vita ipsius, quam unâ tumultuariè exhibemus, ali-  
 quomodo; cæterum sublimis ingenii partus & scripto-  
 rum ejus genius cumulatiùs testentur ac prædicent. Is

in eo acerrimi iudicii nervos contendit, ut ab Ecclesia Christi removeret, quæcunq; aut gloriam Dei, aut spei nostræ solatium, aut Religionis dignitatem, aut deniq; pietatis sinceritatem convellere iudicabat. Habebit igitur Lector in ejus scriptis, primùm convulsas ple-  
rasq; machinas, quibus unâ cum summi Dei honore spes, ad quam aspiramus, Felicitatis nostræ subrueba-  
tur. Habebit universæ religionis decus defensum, & existimationem ab absurdis ac deformibus (quarum nomine hæctenus per summam injuriam apud exteros malè audiebat) opinionibus vindicatam & assertam. Habebit deniq; sublata omnia impedimenta, quæ non sperandę tantum, sed etiam adeundę cœlestis patrimonii hæreditati, ipsi sibi mortales objecerant, injunctæ pietatis pertæsi. Nec enim tantùm universæ sanctimon-  
niæ studium blandis & perniciosis opinionibus extin-  
guebatur, sed etiam manifestorum contra Legem Dei delictorum partim permissa licentia, partim aut ac-  
censa libido, aut etiam imposita fuit necessitas. His obicibus submotis, habebit viam ad supremam vel im-  
probissimi voti beatitudinem, incredibili Dei benefi-  
cio stratam atque expeditam: quam per plura anno-  
rum millia ante Christi adventum humanum genus  
semper desideravit, semper ignoravit: quam ipsi Mo-  
saicæ legis cultores pertenui aliquando suspitione o-  
dorari, nunquam apertè deprehendere potuerunt:  
quam denique à Christo Apostolis patefactam, mox  
succrescentium errorum spinis obsitam, atque dirâ

obruente caligine abditam, rursus exesto fabularum  
 senticeto, ac reddita veritatis luce benignissimus Deus  
 detexit atque restituit. Cui quidem veritati adeò cla-  
 ræ atque illustri, ut assentiatur universus Christianus  
 orbis, semel illam sepositis præjudiciis contempla-  
 ri satis est: verum id uti facere velit, atque au-  
 sit, fallor? an (quo alioqui ineuntis seculi  
 status vergere videtur) iterum in-  
 fontium sanguine, & novis mar-  
 tyriis excitandus est.

---

Ad Lectorem.

*Autor dissimulat nomen: tu nosse laboras:  
 Edidimus nomen: nec tamen edidimus.*

Nomen Autoris *ἀναγγραμὰς ἰδὲν*  
**SAPIS CVM ZELO PURIVS.**

*Num sine flagranti pura est sapientia zelo?  
 Cum zelo sapiens purius ergò sapis.*  
*Samuel Prifuri*

Socini Scriptorum elogium è Bodechero  
ineptiente.

**V**eritas agnoscenda est ubique. Nec enim accipit pretium suum à persona, sed ei dat: Nec possumus hoc loco, quin testimonium illud demus Socino, qua parte cum Orthodoxis conspirat: audiat Christianus orbis, si velit: Punctim disputat: largitur adversario, quicquid potest, sine veritatis & causæ præiudicio: ubi premendus est, ibi pedem figit, & conscientiam urget: Scripturis potius quàm hypothesebus pugnat: & rationibus, non præiudiciis, uti ferè solet Calvini schola: Non stat intra contortulas quasdam captiones: non querit effugia, sed jugulum causæ petit. Reperiunt in eo Athei, Iudæi, Gentiles, Pontificii quod agant; secus quàm in Calvinistarum scriptis.

BIBLIOTECA UNIV.



VERONICAE



